

## **Publicaziuns officialas dils 5 d'avrel 2024**

### **Vischnaunca Trun**

#### **Damondas da baghegiar**

#### **Datum da publicaziun: 05-04-2024**

Petent: Christian Weber, Via Caltgadira 3, 7166 Trun  
Object: Montascha d'in indrez fotovoltaic vid las fatschadas sid e vest sin parcella 1856 a Caltgadira  
Zona: Zona dil Vitg (V)

Petents: STWEG Bearth Manetsch, Via Foppa 1, 7166 Trun  
Representanza: Studio UH architects ETH SIA, Via Sursilvana 18, 7180 Mustér  
Object: Construcziun d'in niev balcon, remplazzament da finiastras e montascha d'ina pumpa termica d'aria sin parcella 2787 a Campliun.  
Zona: Zona d'adattaziun al vitg (VA)

#### **Protestas:**

Ils plans ein deponi en canzlia communal. L'investa publica cuoza 20 dis dapi il datum da publicaziun. Protestas ein d'inoltrar en scret enteifer 20 dis dapi la publicaziun alla suprastonza communal Trun.

*Administraziun communal Trun*

### **Communicaziun dalla suprastonza communal**

Preziadas convischinas

Prezias convischins

Ord motivs da professiun ha geraua Erica Cavegn-Pfister stuiu decider da remetter siu uffeci sin la fin d'uost 2024. La suprastonza e l'administraziun communal deploreschan la demissiun ed engrazian grondamein a geraua Erica per la buna collaboraziun ed il grond engaschi en favur dalla vischnaunca da Trun duront ils davos sis onns. L'elecziun complementara per la suprastonza communal ei planisada ils 9 da zercladur 2024. Las publicaziuns correspondentas suondan.

*Suprastonza communal Trun*

### **Preavis cussegl da vischnaunca**

La proxima sessiun dil cussegl da vischnaunca ha liug gliendisdis, ils 6 da matg 2024 allas 19.30.

*Administraziun communal Trun*

### **Lubientschas da carrar sin las vias d'ual**

Entochen l'entschatta matg vegn la crappa e la lenna ch'ei curdada duront igl unviern sin las vias d'ual rumida. Tgi che carrescha avon sin las vias d'ual fa quei sin atgna resca. Muort plazzal da baghegiar sin la via Uaul dallas Vallettas sco era muort tagls da lenna eis ei da quintar cun restricziuns da carrar.

Las legitimaziuns da carrar sin las vias Alp da Schlans, Boden, Munt e Nadels san vegnir retratgas naven dad immediat tier l'administraziun communal. Las cartas san era vegnir empustadas sur la pagina d'internet [www.trun.ch](http://www.trun.ch).

La suprastonza communal lai menar atras las controllas sin las vias d'ual naven dall'entschatta matg 2024.

*Administraziun communal Trun*

### **Organisaziun rimnada da rufid bloccont dils 18-04-2024**

Sco usitau organisescha la vischnaunca la rimnada da rufid bloccont.

La rimnada en vischnaunca ei destinada per rufid ord ils tenercasa privats da nossa vischnaunca. Ella succeda per segidar cun nossas convischinas e nos convischins e per evitar viadis cun pigns quantums sin la deponia a Plaun Grond, Rueun.

#### **Liug**

La rimanda da rufid bloccont succeda gievgia, ils 18-04-2024, allas 10.00–18.00 ad Igniu/Pustget.

#### **Uorden sil plaz da rimnada**

Il material sto vegnir sortius e deponius tenor instrucziun dil responsabel per la rimnada en ils divers containers.

#### **Cuosts**

Pigns quantums entochen la grondezia dad 1 m<sup>3</sup> vegnan pri encunter gratuitamein. Per quantums che survargan quella dimensiun vegn quintau mintgamai frs. 15.00 per il m<sup>3</sup>. Per pneus senza gavegl ei da pagar ina contribuziun da frs. 6.00 per toc, pneus cun gavegl frs. 12.00 per toc.

Rufid che vegn buca prius encunter:

- lenna che sa vegnir barschada
- plastic dallas ballas da silo
- rufid che croda tier spazzadas, sanaziuns e rumidas da baghetgs
- utensils electronics (san vegnir dismiss tier la deponia Plaun Grond a Rueun)

*Suprastonza communal Trun*

## **Encuretg menadra per bamupi**

### **Nus duvrein tei oder auch Dich!**

Per che nus sappien era vinavon far gimnastica ensemen encurin nus ina nova menadra ni in niev menader da nossas lecziuns da bamupi a Rabiis. Du sprichst kein Romanisch? Macht nichts, wir werden uns schon verstehen. Has interess? Ni has forsa aunc ina damonda? Lu s'annunzia tier la Monika, nossa menadra actuala: 076 515 52 29. Nus affons da bamupi Trun/Sumvitg havessen plascher d'udir da tei!

## **Museum Cuort Ligia Grischa**

### **Salid dil Grischun – In'exposiziun da cartas postalas dils onns glorius**

**Sonda, ils 13 d'avrel 2024** allas 16.00 ha liug la vernissascha ensemen cun ils realisateurs Simon Bundi, Curdin Albin e Pascal Werner dalla Fundaziun grischuna per la fotografia. Nus schein reviver quei temps cun ver 90 cartas postalas en color. L'exposiziun cuozza tochen ils 9 da zercladur.

*Cordial beinvegni fa il team dil museum ed ils expositurs*

## **Evangelisch-Reformierte Kirchgemeinde Cadi**

### **Ordentliche Kirchgemeindeversammlung**

Siehe unter Disentis!

## **Ludoteca Disentis/Mustér e contuorn**

### **Radunoza generala 11-4-2024**

Mira sut vischnaunca Mustér!

## **Movis Disentis**

### **Producziuns dils MOVIS ed acrobatica/gimnastica Cadi**

Mira sut Disentis/Mustér!